



## ХАЛЫҚТЫҢ ӘЛ-АУҚАТЫ ЖАҚСАРАДЫ



Республикалық бюджеттің алдағы үш жылда әлеуметтік бағыты сақталады. Тіпті, 2022–2024 жылдары әлеуметтік сала шығыстары бұрынғыдан 50,8 пайызға дейін өсіп, жалпы көлемі 26,7 трлн теңгеге жетпек. Шығыстар көлемінің көп бөлігі азаматтарды әлеуметтік қамсыздандыру мен оларға көмек көрсетуге арналады. Мәселен, денсаулық сақтау жүйесін дамытуға арналған шығыстар 2022–2024 жылдары 5,7 трлн теңгені, оның ішінде 2022 жылға 1,8 трлн теңге болады. Осы қаражат шеңберінде медицина қызметкерлерінің еңбекақысын ұлғайту көзделіп отыр. Білім және ғылым жүйесінің де қоржыны толығатын сияқты. Алдағы үш жылда бұл саланың еншісіне 7 трлн теңге тиетін болса, оның ішінде 1,8 трлн теңге тек 2022 жылға бөлінбекші. Бұл биыл қарастырылған қаражаттан 477,1 млрд теңгеге артық. Білім беру ұйымдары педагогтары мен медицина қызметкерлерінің еңбекақысын көтеруге 4,3 трлн бөлінгенде, олардың жалақылары 20 пайызға артады екен. Бұл жөнінде осы сәрсенбіде өткен Парламент Мәжілісінің жалпы отырысында белгілі болды. Онда «2022 – 2024 жылдарға арналған республикалық бюджет туралы» заң жобасы қаралған болатын.

(Соңы 3-бетте)



ҰЛТТЫҚ СПОРТ КҮНІ  
БЕЛГІЛЕНБЕК

3-бет



МАКС, СЕНИМЕН МӘҢГІ  
БІРГЕМІН...

8-бет

### СӘТІ ТҮСКЕН СҰХБАТ



Рахила МҰХАМБЕТҚАЛИПОВА,  
отставкадағы судья:

### «ЕЛ СЕНИМІ – БИІК МӘРТЕБЕ»

– Рахила Советқызы, сот жүйесінде 30 жылдан астам жұмыс істепсіз. Бұл аз уақыт емес. Еңбек жолыңыз қалай басталып еді?

– 1985 жылы Саратов заң институтын аяқтадым. Сот жүйесіндегі қызметтік жолым 1986 жылы Ақтөбе қаласының Пролетар аудандық халық сотында сот отырысының хатшысы қызметінен басталды. Екі жылдан соң, 1987 жылдың 21 маусымында Ақтөбе облысы, Шалқар аудандық халық сотына халық судьясы лауазымына сайландым. Ол кезде мен 26 жаста едім.

Шалқар аудандық сотында 10 жылға жуық уақыт судьялық қызмет атқардым. Ол кезде аудандық соттың төрағасы Б.Тайғужиев болатын.

(Соңы 5-бетте)

### ТҮЙТКІЛ

## «ҚАБЫРҒАСЫ СЫНСА ДА, ШАҒЫМДАНБАЙДЫ»

АҚТӨБЕ ОБЛЫСЫНДА ТҰРМЫСТЫҚ ЗОРЛЫҚ-ЗОМБЫЛЫҚТАН ЖАПА ШЕККЕНДЕР САНЫ КӨБЕЙДІ. КҮН САЙЫН ПОЛИЦИЯҒА ОТБАСЫНДА ҚОРЛЫҚ КӨРГЕНІН АЙТЫП, ОҢДАҒАН АДАМ ҚОҢЫРАУ ШАЛАДЫ. ЖЫЛ БАСЫНАН БЕРІ ҮЧАСКЕЛІК ПОЛИЦИЯ ИНСПЕКТОРЛАРЫ ОТБАСЫЛЫҚ ЖАНЖАЛҒА ҚАТЫСТЫ 3,5 МЫҢНАН АСТАМ ҚОРҒАУ НҰСҚАМАСЫН ШЫҒАРҒАН. АҚТӨБЕ ОБЛЫСЫ ПД ЖПҚБ ЕРЕКШЕ ТАПСЫРМАЛАР ЖӨНІНДЕГІ АҒА ИНСПЕКТОРЫ НҰРЛЫБЕК СУЕНТАЕВТЫҢ АЙТУЫНША, ӨҢІРДЕ ҮШ ЖАРЫМ МЫҢНАН АСТАМ АЗАМАТҚА ӘЙЕЛДЕРГЕ, ҚАРТПАР МЕН БАЛАЛАРҒА ЖАҚЫНДАУҒА, ҚОРЛАУҒА, ҚОҢЫРАУ ШАЛУҒА, КҮШ КӨРСЕТУГЕ, ТҮРЛІ ДЕНЕ ЖАРАҚАТТАРЫН КЕЛТІРУГЕ ТЫЙЫМ САЛЫНҒАН. ҚОРҒАУ НҰСҚАМАСЫН БҰЗҒАНЫ ҮШІН 157 АДАМ ЖАУАПҚА ТАРТЫЛДЫ.

– Шын мәнінде, отбасылық зорлық-зомбылық статистикасы әлдеқайда жоғары. Көбіне адамдар полицияға негізінен маскүнемдікке негізделген зорлық-зомбылық фактілері бойынша ғана шағымданады. Көптеген шаңырақтағы психологиялық және физикалық зорлық-зомбылық жабық, жасырын күйде қалады. Тіпті, кейбір әйелдер қабырғасы сынса да, өзін таяққа жыққан адамды айтпайды. Осының нәтижесінде жазаланбаған азамат

одан да ауыр қылмыстарға барып жатады, – дейді Нұрлыбек Суентаев.

Биыл отбасылық-тұрмыстық құқықбұзушылық бойынша 1300-ден астам адам әкімшілік жауапкершілікке тартылған. Полициялар мұндай қылмыстың алдын алу үшін қоғамдық орындарда алкогольді ішімдіктерді ішуге жол бермеу керек деп есептейді. Бүгінгі күні учаскелік полиция инспекторлары спирттік ішімдіктерді ішкені

және қоғамдық орындарда мас күйінде жүргені үшін 7 мың азаматты жауапқа тартып, 143 маскүнемді арнайы емдеу-профилактикалық мекемесіне жіберген. Бұдан бөлек 21 жасқа толмаған азаматтарға алкоголь өнімдерін сатудың 135 фактісінің жолы кесілді.

– Азаматтарға былапыт сөздер айту, қорлап тиісу, кемсіту, үй тұрмысындағы заттарды бұлдіру, олардың тыныштығын бұзу, жеке тұрғын үйде, пәтерде немесе өзге де тұрғынжайда жасалған басқа да әрекеттер әкімшілік жауаптылыққа, яғни тұтқындауға әкеп соғатын құқықбұзушылық екенін еске салғым келеді. Сондықтан, егер сіз тұрмыстық зорлық-зомбылықтан зардап шегіп, шағымданбай жүрген адамды білсеңіз, оған учаскелік полиция инспекторына жүгіну керектігін айтыңыз. Үнсіздік ауыр қылмысты тудыруы мүмкін. Өкінішке орай, мұндай фактілер бар, – дейді полиция қызметкері.

Жансая ЕСМАҒАНБЕТОВА,  
АҚТӨБЕ ҚАЛАСЫ

### БЮДЖЕТ ТАПШЫЛЫҒЫН ҰЛТТЫҚ ҚОРДЫҢ ЕСЕБІНЕН ЖАБУ ДҰРЫС ПА?

Әзімхан САТЫБАЛДИН, ҚР БҒМ ҒК Экономика институтының директоры, экономика ғылымдарының докторы, профессор, ҚР ҰҒА академигі:

– Бюджет тапшылығын жабудың екі-ақ жолы бар. Біріншісі – бюджетке түсетін табысты ұлғайту. Өндірісті жүргізіп, өндірілген өнімді өңдеп, экспортқа шығаратын болса, қымбатырақ сатылады. Өңделмеген өнім шикізат ретінде арзан бағаланады. Негүрлым өндіріс дамып, өнімді көп өндірсе, оны сату арқылы бюджет кірісі ұлғаяды. Екіншісі, Ұлттық қордың қандай мақсатпен құрғанымызға қарау керек. Ол кезде біз, қателеспесем, бұл болашақ ұрпақтың қоры деп айттық. Қазір енді кішкене қиындық болып жатқан шығар.

Үкімет бюджетті жоспарлаған кезде ондағы тапшылықты жою үшін Ұлттық қордан трансфертелетін қаржыға арқа сүйеп жүр. Біз осыған орай, «Бұл болашақ ұрпақтың несібесіне ортақтасу емес пе?» деген сауалды сарапшылар назарына ұсынған едік.

Ораз БАЙМҰРАТОВ, Әлеуметтік экономика және қаржы институтының директоры, ҰР ҰҒА академигі, экономика ғылымдарының докторы:

– Бюджет тапшылығын Ұлттық қордың есебінен жабуды дұрыс не бұрыс деп біржақты айтуға болмайды. Егер Ұлттық қордан трансфертелетін бұл қаржы халық мүддесіне жұмсалатын болса, оның еш сәтсіздігі жоқ. Әсіресе, қазіргідей дағдарыс жағдайында бұл неге болмайды деген сұрақтың тууы заңдылық қой. Жұмыссыздық көбейіп, өндіріс орны қысқарып жатқан кезде, Үкімет халыққа міндетті түрде көмектесуі керек. Егер қажетті қаржы бюджетте жетпесе, Ұлттық қордан неге алмасқа? Бюджет тапшылығын жою үшін Ұлттық қордан алынған қаржы өз мақсатына тиімді жұмсалып, ел игілігіне жаратылатын болса, құптау керек.

(Соңы 3-бетте)













